



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Tanzania nung opposition lenir Lissu chiokogo

Novak Djokovic-i US Open kokogo



VOL. XX NO. 331 (ADOK 331) DIMAPUR SANGTENNÜ (TUESDAY) RONGJUI (SEPTEMBER) 12, 2023 ₹ 5.00

14 buba NLA nung Act kar agizük & Bill 3 benok

Kohima, September 11, 2023 (TYO): 14 buba Nagaland Legislative Assembly (NLA) indang session tanabuba tanu nungi tenzükogo.

Session mezüing anogo nung NLA-i The Prohibition of Employment as Manual Scavengers and their Rehabilitation Act 2013 agizüka Employment of Manual Scavengers and Construction of Dry Latrines (Prohibition), Act, 1993 agienogo.

Tanü assembly nungsa The Protection of Children from Sexual Offences (POCSO), Amendment Act, 2019 aser The Protection of Children from Sexual Offences (POCSO), Rules, 2020 agizükogo.

State sorkari September 26, 2016 nü The POCSO Act, 2012 agizük. Ajisüaka Ministry of Law and Justice-i POCSO Act 2012 yanglushir The POCSO (Amendment) Act, 2019 sangdonga liasü aser ibaji state balalai agizükogo, ta CM Rio-ia ashi.

State Cabinet-i The POCSO (Amendment) Act, 2019 aser The POCSO, Rules, 2020 mulunga agizükogo anungji Act aser Rule agizüksü nungdaker ta CM Rio-isa ashi.

Hombarnü state assembly nung government Bills asem benok.

Health & Family Welfare Minister P. Paiwang Konyak-i The Nagaland Motor Vehicles Taxation (Amendment) Bill, 2023 aser The Nagaland Passengers & Goods Taxation (Amendment) Bill, 2023 benok.

Higher Education Minister

Temjen Inna Along-i North East Christian University (Second Amendment) Bill, 2023 benok.

Assembly Speaker Sharingain Longkumer-i asüing Bill asem indang jembitsü aser agizüksü mapang agütsütsü metetdaksü.

“Taküm March assembly session nung agizükba The Nagaland Municipal Act 2001 (Repeal Bill, 2023), The Nagaland Fire And Emergency Services Bill-2021, The Nagaland Goods And Services Tax (Sixth Amendment) Bill, 2022; The Nagaland Appropriation Bill (No.1), 2023 aser The Nagaland Appropriation Bill (No.2), 2023 ajak Nagaland Governor La Ganesan-ia mulunga agizükogo” ta NLA Secretary-in-Charge Khruohituonuo Rio-i osang metetdaksü.

Tanü session nung Chief Minister Rio aser Speaker Longkumer nati taoba Minister aser MLA Noke Wangnao August 28 nü asüba bilemteta tetushi agütsü.

Iba mapang MLA temi minute ka ola madoki tasür nem tetushi agütsü aser asüri toksür aoba kibong den asükhu lemsatop.

Asür Noke Wangnao-i kümsük 10 ben tashi MLA inyaka aruogo. Nagaland nung mapang talangtiba MLA inyaksangji pa liasü.

Tanü session nung Parliamentary Affairs Minister K G Kenye-ia Fifth Report of the Rules Committee aser Advisor & Committee on Public Undertakings (COPU) Chairman Imkong Imchen-i Internal Working Rules of the Committee on Public Undertakings (First Amendment) 2023 benoka liasü.

Nagaland Assembly-i UCC aser Forest Act magizüker



Chief Minister Neiphiu Rio-i 14 buba Nagaland Legislative Assembly (NLA) monsoon session tenzükba anogo nung jembiba angur.

Kohima, September 11, 2023 (TYO): Hombarnü Nagaland Legislative Assembly nung züngsem ajaki Uniform Civil Code (UCC) aser Forest Conservation (Amendment) Act magizüksü aser 16 Point Agreement o Arlla 371A kübok state kümüzüka ayutsü bangzüngtep.

State Assembly monsoon session mezüingbuba anogo nung “Discussion on matters of Urgent Public Importance” mapang onük ana ya benoka jemi.

Züngsem 60 agi akümba opposition maliba sorkar nung tawa MLA Noke Wangnao asüba sülen MLA 59 lir. Nationalist Democratic Progressive Party (NDPP), BJP, NCP, NPP, LJP (Ram Vilas), Naga People's Front (NPF), RPI (Athawale), JD(U) aser Independent MLA temi UCC aser FCA atema mapang talangka jembitepa liasü.

NPF MLA Kuzholuzo Nienu-i onük anaprong ya mapa balala nung benokdang “Naga nunger Arlla 371A kübok kümüzüka lir aser iba nung Parliament indang

act kecha Nagaland state nung benoka mamshitsü shia lir” ta pai ashi.

“Asenoki UCC aser Forest Act khenyongi magizüker ta bangzüngteptsüla aji ta mesüra tarutsü nung asenok (MLA) dak tai tongloksütsü” ta MLA Kuzholuzo-isa ashi.

“Centre nung BJP sorkari state ajungalen renloksü atema bilemtsür. Nagaland Assembly-i UCC aser Forest Act atema bangzüngtem renemba nung State BJP Legislature adener” ta Nagaland BJP president aser Cabinet Minister Temjen Inna Along-ia ashi.

NCP Legislature Party Deputy Leader MLA P. Longon aser NPP Legislature Party leader Nuklutoshi Longkumer naprongi pei pei party tenüing nung item ozüing ana ya Nagaland nung mamshitetsü ta ashi.

“India nung political agreement ka nung sign süteper state ka akümbaji Nagaland dang lir. 16 Point Agreement nung ajemdaker asenok India kübok state ka aküm aser Constitution of India nung Arlla 371A enoksem” ta Chief Minister

Neiphiu Rio-ia ashi.

India sorkari iba tenangzüktep mezüingmeshi masütsü aser Naga nunger nem linük temzüing agi tashi balaka agüja aliba anema meinyaksü, ta CM Rio-isa ashi.

“State cabinet-i 22nd Law Commission dang UCC kübok Nagaland medendaksütsü atema shidi ka zülüogo. Cabinet-isa Union Home Minister Amit Shah den sendentem menogo aser idangji pai UCC ya lisopurtem aser Northeast nunger atema masü ta shiogo” ta paisa metetdaksü.

“State sorkar ya Centre nung NDA den yariteper ka lir anungji Centre sorkar indang policy aser telemtetbatem anema moutettsü. Iba jagi Nagaland assembly-i Centre dang UCC aser Forest Conservation Amendment Act nung Nagaland medendaksütsü atema bangzüngteper temepishiba ka yoktsü akok” ta CM Rio-isa ashi.

Iba sülen NLA Speaker Sharingain Longkumer-i Mongulbarnü assembly-i lemtet ka agia onük atema bangzüing balala renemtsü osang metetdaksü.

Army-i onok jaok: Editors Guild of India

New Delhi, September 11, 2023 (Agencies): Army-i jaokba atema Editors Guild of India (EGI) teshimtet telok kati Manipur semdang ta September 11 nü EGI-i Supreme Court dang ashi.

Manipur nung local media-i tim mesüi aser külen tsütsü tejak shir osang belenshiba asadangtsü atema onok jaok ta EGI-i ashi.

“Onoki onok sasa Manipur-i aotsü mulungtetba masü. Army-i onok dang mepishi. Army-i onok dangi shidi ka zülü” ta EGI atema jembitsür senior advocate Kapil Sibal-i ashi.

Tanü Chief Justice of India D.Y. Chandrachud-i aniba Bench tsüingdang EGI-i osang sangoktsü.

“Kechiba Army-i EGI dang Manipur-i aotsü ashi?” ta Chief Justice Chandrachud-i asüingdang.

“Parnoki onok nem tatalokbatem asadang südaksünüa liasü. Onoki

September 2 nü onok report metetdaksü. September 3 aonung Indian Penal Code kübok onok anema ken o benok. Chief Minister-ia onok anema jemi. Report ka atema kodaser onok anema ken o benok?” ta Sibal-i Supreme Court dang asüingdang.

Idangji Chief Justice Chandrachud-i Manipur government Solicitor General Tushar Mehta dang EGI report nung ajemdaker First Information Report (FIR) benok ta nenshia ashi.

“Iba ya report ka dang lir. Pai (Sibal) ashiba amaji parnoki report ka dang agütsü aser iba ya parnok (EGI) tangatetba dang asütsü akok. Iba ya nisung kari ozüing alema inyakba masü. Parnoki report dang ka saya” ta Chief Justice-isa ashi.

Iba ken o ya ano September 15, 2023 nü Supreme Court nung angadangtsü.

Kiphire Aspirational District atema Rs. 3816.64 lakhs lemezüksüo

Kohima, September 11, 2023 (TYO): Kiphire Aspirational District nung mapatong balala atema Rs. 3816.64 lakhs agütsüo ta Nagaland Deputy Chief Minister (Planning & Transformation and National Highway) TR Zeliang-ia ashi.

“NITI Aayog - Rs. 1905.31 lakhs, Ministry of Skill Development & North Eastern Council - Rs. 552.76 lakh, Government of Nagaland - Rs. 100 lakh, Corporate Social Responsibility - Rs. 958.57 lakh and Tribal Affairs (Article 257 (1) - Rs. 300 lakhs agütsüo” ta TR Zeliang-ia MLA C. Kipili Sangtam-i asüingdangba langzüingdang ashi.

2018 nungi tang tashi nung Rs.2701.22 lakh lemezüksüo ta paisa shisem.

“Kiphire Aspirational District atema state nodal department ji Planning & Transformation department lir aser district jenjang nung scheme mapa kuma inyaksübaji District

Administration tebilemtsü lir” ta TR Zeliang-isa ashi.

Assistant Sub Inspector: DEF Nagaland kübok Assistant Sub Inspector (ASI) sanctioned posts 352 lir ta Deputy Chief Minister (Home) Y. Patton-ia ashi.

MLA Kuzholuzo Nienu-i asüingdangba langzüingdang Y Patton-i ASI 172 shimoka lir ta ashi.

ASI nungi Sub Inspector (SI) promotion ya 50% direct recruitment aser 50% promotion of available vacancy lir ta paisa ashi.

CDPO office: Nagaland nung Child Development Project Officer (CDPO) office 60 lir ta Chief Minister Neiphiu Rio-ia ashi.

CM Rio-i Social Welfare Department ketdangsa reprinter aser tanü MLA Picto Shohe-ia asüingdangba langzüingdang iba osang metetdaksü.

32 A/C Atoizu atema tanü tashi Integrated Child Development Services (ICDS)

kübok project/block balaka metenzükba indang osang ashidang “Ministry of Women & Child Development, Government of India dangi iba atema shidi zülüogo saka tang tashi telangzüba kecha mangu lir” ta CM Rio-isa ashi.

Phek water supply: “Laka source nungi Phek jilai Rs. 42.59 lakh endoka water supply indang main pipeline yanglushitsü atema June 15, 2023 nü PHED Directorate nung agütsü aser ibaji sorkar dangi benogo” ta PHED Minister Jacob Zhimomi-ia metetdaksü.

MLA Nienu-i asüingdangba langzüingdang “PHED Directorate dang June 21, 2023 nü verification asütsü shiogo” ta Minister Jacob-ia ashi.

“PHED Directorate nungi July 11 nü estimate angu aser Ministry nungi temelaba meshiba sülen July 18 nü State Planning & Transformation Department dangi senotsü talila meshiogo” ta paisa metetdaksü.

NSBSG 43 nem Rajya Puraskar sempet agütsü



Nagaland State Bharat Scouts & Guides (NSBSG) nem Rajya Puraskar sempet agütsüba sentong ka Dr. Imkongliba Ao Hall, Raj Bhavan, Kohima nung September 11, 2023 nü agidang tangokba noksa ka nung Nagaland Angh aser Nagaland State Bharat Scouts and Guides indang Chief Patron, La Ganesan den ketdangsür aser Rajya Puraskar sempet agizüker par 43 angur.

Dimapur, Rongjui/Sept. 11 (TYO): Nagaland State Bharat Scouts & Guides (NSBSG) pur Rajya Puraskar sempet agütsüba sentong ka Dr. Imkongliba Ao Hall, Raj Bhavan, Kohima nung September 11, 2023 nü agia liasü, kong Nagaland Angh aser Nagaland State Bharat Scouts and Guides indang Chief Patron, La Ganesan dena liasü.

Rajya Puraskar sentong ya state level nung Scouts and Guides atema award tematiba lir aser iba sentong nung jembidang, Scouts and Guides movement yagi lanurtem ainba aser terenlok nung yarir, pai asoshi mebilemi inyaktsü, temeim alitsü aser linük

tebilemstü khuret angatetdaksür, ta Angh La Ganesan-i ashi.

Iba ya ajanga nisung shia loktiliba nung züngsem tajung akumtsü aser terenlok asoshi mapa tajung inyaktsü ajungmesor aser iba movement yagi lanurtem khuret angatetba senso kumdaksütsü tashi agütsür, tarutsü lanur akumtsü asoshi maparen balala inyaker, ta ashi.

Lanur Scouts and Guides temi meranga inyakba aser lenla balala nung alizüng tongtetba ajiteta tetushi agütsütsü mechi iba sentong ya ayongzük, ta pai ashi.

Iba sempet ya temaitsü ka dang masü aser nenok ya Nagaland State Bharat Scouts

and Guides nung züngsemtem rongnungi meranga inyakba, bendanga agütsüba aser tashitsü keta inyaktetba kuli lir, ta Nagaland Angh-i ashi.

Iba sentong nung angh-i Rajya Puraskar award ya nisung 43 nem agüja liasü, kong Secretary, Youth Resources & Sports aser NSBSG ketdangsürtem dena liasü.

Secretary YRS & VP NSBSG Anthony Ngullie, NCS ajanga iba sentong ayongzükba nukjidong rateta ashi. Sentong ya State Organizing Commissioner (Guide), Vimezhonu Tetso lenisüba kübok agi aser VP, NSBSG K. Neibou Sekhose-i melepzüng o jembia liasü.

Employment, Skill Development & Entrepreneurship ajanga jangjashitsür

Dimapur, Rongjui/Sept. 11 (TYO): District ti nung aliba Government ITI nung 2020-21, 2021-22 aser 2022-23 session tem nung training agir nem stipend magütsü ta NPCC (PCG) ajanga sangdongba osang ka August 23, 2023 nü osangkaket nung adokba atema Directorate of Employment, Skill Development & Entrepreneurship ajanga ashiba agi, session 2020-21 asoshi stipend mapang shidak nung agütsüogo.

Government of Nagaland, Finance Department ajanga Direct Benefit Transfer (DBT) Schemes ya 'end- to -end

digitalized' asütsüla aser yangji online registration, computerized processing aser electronic payments tem indang-indanga teyari angur indang bank account nung inoktsütsü shia aliba mechi 2021-22 aser 2022-23 atema stipend magütsüteti lir, ta ashi.

Iba totuyuba sülen anidaksü asoshi Craftsmen Training Scheme Stipend (CTSS) indang 'end -to- end digitalization' ya tang teyagludak lir aser National Informatics Center (NIC) den Service Plus Portal nung onboarding asüba mapang lir, ta ashi.

DBT ajanga stipends

agütsütsü asoshi nüngdakba "Execution of Lease Deed Agreement for Sub- Authentication User Agency (Sub- AUA)" Memorandum of understanding (MoU) ya NIC den zülutepa agütsüba mapang lir.

Item kulitem mechi stipend ya asaa menudaksüba masü saka training agir nem tekeratiba nung iba teyari agütsütsü asoshi Department-i akokba tashi meranga inyaker.

Tarutsü nung mangatetjem alibatem angatetteptsü aser jangiateptsü asoshi department-i molunga lir, ta sangdong ajanga ashi

Assam Rifles temi sentong balala ayongzüka agi

Dimapur, Rongjui/Sept. 11 (TYO): Assam Rifles temi Peren district kübok St Xavier Higher Secondary School, Samzuiram Village nung kaketshirtem Indian Army nung adentsü asoshi ajungmesoa jembiba sentong ka September 11, 2023 nü ayongzüka liasü.

Iba sentong nung Agniveer recruitment inyakyim aser anu career tsütsü tetsür aser teburtem atema defence forces nung lenmang aliba, entries asoshi yimya balala, security forces nung aliba tajangzük, eligibility conditions aser recruitment agitsü aliba indang lemsatapa liasü.

Kaketshirtem dang Assam Rifles temi teyari balala, training agütsüba indanga rateta ashi.

Iba sentong nung kaketshir 150 dena liasü aser sentong tembangba sülen Indian Army aser Assam Rifles indang recruitment scheme tejangja pdf nung lemsatapa liasü.



Indian Red Cross Society Nagaland (IRCSN) State Branch ajanga High School Junction, Kohima nung kitsük-kirong lendong ajurur aliba tesem semdanga teyari oset balala agüja liasü. Iba kitsük-kirong lendong ya September 9, 2023 nü atalok.

Mon nung election mapang gari amshiba taa agütsütsü

Dimapur, Rongjui/Sept. 11 (TYO): 14th Nagaland Legislative Assembly atema General Election agiba mapang Election duty nung amshitsü asoshi Dimapur nungi gari requisitioned asüba kibur/driver tem dang Deputy Commissioner, Mon, Ajit Kumar Verma, IAS ajanga osang tongtipang ka sangdongogo.

Sangdong ajanga ashiba agi, gari amshiba taa ya Office of the Deputy Commissioner, Dimapur, Election Branch nungi office mapang

September 12-16, 2023 anogotem arua meshitsü akok. Iba taa agitsü asoshi gari kibur/driver temi gari requisition mapang agütsüba original Vehicle Requisition slip bener arutsüla. Original requisition slip melira taa magütsütsü, ta sangdong ajanga ashi.

Gari kibur/driver ajungai item tenüngdakba bener mapang shidak nung arua gari amshiba taa meshitsü metstdaksür, ta sangdong ajangasa ashi.

AKM acahayanga akaba Free Coaching Class Rongjui 11 nü tenzükogo



AKM acahayanga akaba Free Coaching Class September 11 nü tenzükba nüngtem nung sarasadem sentong ka agir kelen Kaketshirtem, AKM lenirtem aser Senior Sub-Divisional Education Officer Mokochung Wb. Jonglemdong nung külemi tangokba noksa.

Mokokchung, Rongjui/September 11 (TYO): Ao Kaketshir Mungdang-i (AKM) kaketshirtem asoshi acahayanga Free Coaching Class agutsüba mapatong September 11 nü tenzükogo.

Ao Kaketshir Mungdang-i Class 10 tatidang nung tamakok ngur ano tanaben agutsütsüpur asoshi iba Free Coaching Class ya 1997 küm nungi Kaketshirtem ajungshia agidagi, takum kum asoshi iba Free Coaching Class tenzükba nüngtem nung AKM Conference Hall nung September 11 nü 12: Ako nungi tenzükba sarasadem sentong tajung ka agiogo.

Tanu iba sentong nung Senior Sub-Divisional Education Officer Mokochung Wb. Jonglemdong-i mapang tatsüka agia talisa coaching class nung adener kaketshirtem ajungshia jembidang iba coaching class nung adenertem ya taoba tatidang nung tamakok ngur tanaben agutsüshirtem lir, tangarbo regular class nung dena anogoshia class nung angazüker tatidang agutsütsü, anungji coaching class nung adenertem ibaji angateta kanga dang temelung meranga bendanga aguja azüngtsüla ta kaketshirtem ajungshi.

Senior Sub-Divisional Education Officer Mokochung-isa AKM-i iba Free Coaching Class kum aika

dang achayanga kaketshirtem takokleni anitetba mapatong inyakba ya tarutsü putu asoshi mangdang tajung yur inyakba lirta AKM tenung sanga ashi.

Tesayur shirnokisa iba Free Coaching Class nung sayutsü asoshi mapang agutsüteta lir nenok ajaki item kaketshirtem coaching class nung adenba ya takok angutsü teimla nung adener asünung parnok takok ngudaksütsü asoshi tasa bushia sayuangmata tesayurtem ayongzüka liasü.

Sentong nungsa AKM Tongti Zülur Sb. Satemmongba-i tarur pela agizükba den AKM-i iba Free Coaching Class ayonga akaba nukjidong telok den lemsatap. Iba den AKM Shisaliok Zülur Sb. Lanulemba ajanga Coaching Class akaba mapang nung teinyakstütem rasa-a shia liasü aser AKM nung Tetsür Ashiakumer Kr. Kumzükienla ketdangsüba nung iba sentong agi aser tatemsa Artang Baptist Arogo Youth Pastor Sb. Wapang ajanga iba coaching class nung adener kaketshirtem asoshi Tsüngrem dang temoatsü meshia aser sentong takok ngudaksüba asoshi Tsüngrem nem tenungsang aguja sarasadem iba sentong tembang. Iba Free Coaching Class nung tesayurtemji Jaya Singh- Science Subject, Limasenla- Social Science aser Imjungwati- Mathematics ta alitsü.

PM Modi-i Saudi PM Mohammed Bin Salman den senden amen



September 11, 2023 nü Rashtrapati Bhavan, New Delhi nung linük Tir, Droupadi Murmu aser Ato kilonser, Narendra Modi nati Saudi Arabia Crown Prince aser Ato kilonser Mohammed bin Salman bin Abdulaziz Al Saud agizükdang tangokba noksa nung angur.

New Delhi, September 11 (Agencies): Hombarnü New Delhi nung Ato kilonser Narendra Modi aser Saudi Crown Prince, Mohammed bin Salman na senden amenba sülen India aser Saudi Arabia nati tezüngzüktep 8 agiogo, ta Ministry of External Affairs (MEA) metetdaksü.

Saudi Arabai Ato kilonser, Salman dang 'MBS' taka ajar. Honibarnü pa India-i aruba sülen New Delhi nung anogo ananü G20 senden nung aden.

Amongnü G20 senden tembangba sülen Hombarnü Modi aser Tir, Droupadi Murmu nati Rashtrapati Bhavan nung pa agizük.

Ato kilonser Modi aser MBS na senden anaben amenba sülen India aser Saudi Arabia na tsünga tezüngzüktep ti agiogo; item tezüngzüktepi digitalisation, shishilembaba & investment

asere ochimashi aser ozünga benokba nung amalitepa inyaktsü den sendaktepa lir.

Senden tembangba sülen Modi-i twitter ajanga, "Tamarener Prince Mohammed bin Salman bin Abdulaziz Al Saud küna takok ngua senden menogo. Künati asen linük ana tesendaktep jenjang asadang aser tarutsü nunga maneni linük ana tsünga commercial tesendaktep tajungba akümtsü imlar," ta metetdaksü.

Modi aser MBS na mendenbuba ser mezüngbuba India-Saudi Arabia Strategic Partnership Council (SPC) senden amen. Tamalen SPC ministerial senden-a ka mena liasü.

Iba senden ya India-Saudi ken o jembiba nung otsü tase ka lir, ta shia MEA otongdar, Arindam Bagchi-i, "Energy security, shishilembaba & investment, defence & security,

healthcare, chiyungtsü security, culture & community welfare densema lenla aika nung linük ana tsünga amalitepa inyaktsü atema jembio," ta metetdaksü.

Bagchi-isa, "Lenir anati linük ana lenla balala nung tesendaktep jenjang repringhia asadangba den külemi India-Saudi Strategic Partnership ano tajungba akümtsü atema jembio," ta ashi.

Narendra Modi-i, Saudi Arabia ya India nung asalentong partners rongnung tongtibangtiba lir aser tensa mapang dak apet linük ana tsünga tesendaktep nung aika bendenloker, ta ashi.

MBS-i, "G20 senden nung agütsüba sangdong balala ajanga alima ajak tajangzük angutsü. Linük anaprong tarutsü jenjang tajungba akümtsü atema onoki longjemer inyaktsü," ta metetdaksü.

Election Commissioner Arun Goel leniba nung Maldives semdang

New Delhi, September 11 (Agencies): Election Commission of Maldives-i jaokba nung ajemdaker election commissioner, Arun Goel leniba nung nisung aseme tang Maldives nung election tagidak repringtsü atema Maldives semdang, ta Hombarnü Election Commission of India (ECI)-i sangdong ka ajanga metetdaksü.

Maldives nung election mezüngbuba shilem September 9, 2023 nü agiogo aser tanabuba shilemji September 30 nü agitsü.

Iba election nung candidates

8-i tokteper. Constitution of Maldives, 2008, election (General) Act, 2008, presidential elections Act, 2008 aser presidential elections rules & regulations, 2008 nung ajemdaker iba election agir.

Election mezüngbuba shilem agiba anogo nungsa (September 9, 2023) vote azünga, aser candidates kati danga vote shilem 50 dak tema mangu.

Maldives semdangertemji Election Commissioner Arun Goel den deputy election commissioner Ajay Bhadoo aser Principal Secretary, Pramod Kumar Sharma

nunger lir.

Parnoki Male aser Hulhumale nung polling booths 22 semdanga election agiba inyakim, voters registration agiba aser maitsü jangjaba inyakim repringdangogo, ta ECI-isa metetdaksü.

Election observation programme nungjisa linük balala aser organization balalaia shilem agi.

Maldives indang election ozüngtem kübok election tanabuba shilem nungjibo mezüngbuba election shilem nung vote teimba angur candidate anati dang tokteptsü.



September 11, 2023 nü Varanasi (Uttar Pradesh) nung Mauritius Ato kilonser, Pravind Jugnauth agizükdang tangokba noksa nung angur.

Uttar Pradesh nung tzünglu dak sendakba lendong nung nisung 19 asü

New Delhi, Rongjui/September 11 (Agencies):

Tesüiba ghonda 24 tsünga Uttar Pradesh nung tzünglu dak sendakba lendong balala nung nisung 19 süogo; tzünglu maneni aruba agi Hombarnü tesem kar nungbo school shibanga liasü.

Tesüiba ghonda 24 tsünga state kübok district 22 nungbo tzünglu 40 mm dak tema aru. Item district ji Moradabad, Sambhal, Kannauj, Rampur, Hathras, Barabanki, Kasganj, Bijnor, Amroha, Bahraich, Lucknow, Badaun, Mainpuri, Hardoi, Firozabad, Bareilly, Shahjahanpur, Kanpur, Sitapur, Farrukhabad, Lakhimpur Kheri aser Fatehpur lir.

Tzünglu dak sendakba lendong balala nung Hardoi nung nisung pezü asü, Barabanki nung nisung asem asü, Pratapgarh aser Kannauj na nung nisung anana asü aser Amethi, Deoria, Jalaun, Kanpur, Unnao, Sambhal, Rampur den Muzaffarnagar district shia nungi nisung kaka süogo, ta

Hombarnü ketdangsertemi metetdaksü.

Iba tensa nung ajemdaker Chief Minister Yogi Adityanath-i ketdangsertem dang tzünglu dak sendakba lendong agi kongshiba tesemtem nung kümzüka maparen inyakba den külemi teyari agüjang, ta tetuyuba agütsüogo.

Chief minister-isa tzü atsüngdenba tesemtem nung kilentzü aodak yanglushiang aser ayongtem nung tzü level maneni mita repringang, ta tuyu.

Paisa ketdangsertem dang tzünglu ajanga alu nung teraksatsüba asadangang aser aluyimertem nem senotsü teyari agütsütsü atema takoksa anguba report agüjang, ta tuyu.

September 14 tashi state anüolen tsütsü tzünglu maneni arutsü, ta weather department-i tekümdangtsü metetdaksüogo.

State nung tzümettsüng agi yim 173 nung nisung 55,982 kongshio.



September 11, 2023 nü New Delhi nung taoba mapang Congress MP, Jyoti Mirdha-i BJP nung adenba sülen lai BJP National Tir, JP Nadda ajurudang tangokba noksa nung angur.

INDIA Coordination Committee senden amentsü: RJD MP Manoj Jha

New Delhi, September 11 (Agencies):

Opposition teloktep INDIA indang mezüngbuba coordination committee senden September 13 nü amentsü aser iba senden nungji election nüboyim sentong agitsü aser lokti senden agitsü atema o lemteptsü, ta Hombarnü Rashtriya Janata Dal (RJD) lenir, Manoj Jha-i metetdaksü.

Hombarnü osangbenertem den jembidang RJD MP, Jha-i, tawa state trok nung agiba assembly by elections nung INDIA teloktepi menden pezü nung takok angu aser BJP-i menden asem nung takok anguba ajanga INDIA teloktep jenjang ajungba kuli sayur, ta ashi.

"September 13 nü sendenji kanga tongtibang asütsü. Sub-groups senden aika menogo, item rongnung social media committee, campaign committee aser research committee sendentem densema lir. Item senden nung lemtetbatemji agizüksü," ta pai metetdaksü.

INDIA coordination

committee nungji züngsem 13 lir aser Bodhbarnü iba sendenji Delhi nung Nationalist Congress Party (NCP) Tir, Sharad Pawar'er kidang amentsü.

Opposition party 27-i sangküm Lok Sabha election nung BJP-i aniba NDA teloktep anema tokteptsü atema Indian National Developmental Inclusive Alliance (INDIA) teloktep tentet.

Enforcement Directorate (ED)-i Trinamool Congress lenir aser INDIA Coordination Committee nung züngsem, Abhishek Banerjee jaokba dak sendakba nung tasüngdangba ka langzüdang

Jha-i, sorkari yimtenren ajanga opposition matsüngdang tamakok angutsü aliba tesemtem nung agencies tim mesüi amshir, ta aitsü.

"Onoki INDIA teloktep tentetba anogo nungsa sorkari onok anema ED, I-T aser CBI amshitsü, ta onoki meteta dang liasü. Tanü Abhishek Banerjee jaoker, aser asüng tangar kar jaoktsü," ta ashi.



TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI (SEPTEMBER) 12, 2023

Tanur Samaba Tebilemstsü

- Tangsen Lemtur

Tawa Dimapur nung 'World Day Against Trafficking in Persons' anogomong amongdang ketdangser kati, Nagaland nung nisung samabatem rongnung shilem 83 bo arrshi küm 18 ser tekübok tanurtem lir, ta metetdaksüogo. Tawa-tanü Nagaland nunga osangkakettem aser social media nung tanur samaba osang kanga bulua prokshir, aser iba ya tsüraburtem atema tebilemstsü tuluka kümogo. Tang Nagaland nung hopta shia tanur asembosa samaba osang police station nung metetdaksür, ta ketdangseri metetdaksüba osangji taoksatsüka lir! Nagaland nung talisa Kohima, Dimapur aser Mokokchung nung pei kidang school züngdakja ki mapa nung yaritepa alitsü atema tanur bushia anir arur. Tanurtem samaba kuliji aika lir saka teimbaka tejashi nung jena aoba lir. Tanur karbo tangari mesüzüka anir aoer aser karbo tejashi nung peisasa kidang nungi ajener. Tanur asü dang tsürabur nungi pilar tangar kidang lidaktsüba mesüra pei kidang nungi jena aoba tiaji kangasa temeimtsüka. Item ama tanurtemji intetdang parnok teimbaka tia tamajungi aitsü mesüra nisung tamajung küma lokti atema khuret asütsü. Ano tanur karbo pei kidang tsüraburi tanurtem rongnung bendangshidanga züngshiba agi temelung yirur kidang nungi jena aoba lir, aser ibajibo tsürabur kangasa tai asütsü. Ano külen asenok aikati kidang school züngdakja ki mapa nunga yariteptsü atema kilir ayur. Tsürabur aikati pei chirnurtem tangar tenzüka liaka school zünger tajung kümdaktsütsü nükla nung tangar kidang alitsü yoker, saka ki kiburtemi item kilirtem dang mejung-mazüi benshia tia tamajungi yokra Tsüngrem tsüngdang-a asenok sentsühtsür asütsü. Ki kibur aikati item kilir tiaji meteta pei chirnur rongnung ka ama züngshia tazüngtsü tashi züngdaktsür pei sasa tebok mesüa alitsüsa jenjang kabosa alangzüktsütsü meranger; item ama kiburtemji koda tajung; ajisüaka kibur karibo ki mapa tali inyakdaktsür, chiyungtsübo junga magütsür aser mapang shia temang nung tarak keta azüker; item amaji ajanga kilir tanurtem anojungi shisatsü nunga ya-mata kümdaktsütsü. Aji oda akok tashi asen chirnur süaka kilir süaka tanurtem mejashidaktsüi parnok pelaa yutsütsüji tsüraburtem khuret asütsü. Kidang nungi chirnur süaka kilir süaka tanur samaba mesüra ajenbaji aiben tanur tai masü saka asenok tai, ta tsüraburtemi agizüktettsüla. Ano külen kidang kilir liaka chirnurtem nem-a peii akokba mapa inyakdakja mapa nung rüoktsüla. Tsüraburi kilir nem dang mapa ajak inyakdaktsür aser ibaji ajanga pei chirnurtembo mapa nung merüoker; ibajibo pei sasa pei chirnur ashioktsüba den kasa asütsü. Tsüraburtemi pei kibong nung chirnur ajak kasa züngshiba aser kilirtem dang junga benshiba ajanga tanurtem samaba ya kanga ajema kümadoktsü. Akhidangbo tsüraburtemi dang tanur ajak repranga anitet, ajisüaka tanü-asüng kibong aika nung, talisa apuani naprong sorkar mapa inyakba kibongtemi kidang yaritepa alitsü atema kilirtem nüngdaker. Kilirtem kidang ayuba ya ki mapa nung parnoki akokba agi asenok den yariteptsü atema aser asenokia parnok tajung kümdaktsütsü atema, ta tangatetba lira ibaji ajanga ajak kasa ajangzüktsü.

OLEMSABANG

Nabong taremtsü mapang nung raratepa tongteper

- L. Kika pongener

(Yashi adok nungi...)

Asen Ao kin iba jenjang nung yasa alinungbo, asenok tesuleni talangka atsüngzüka luadoktsü, aser tangar kodanga memeneptsü. Naga nung kintem rongnung teimba ka, oda kin ajunga dang amai, asen Ao kin-i Yisu yimsu osangtajung sayua tenuk lapoktsü. Yisu yimsu osangtajung nung tongtipang tesayubaji ajemalua tila akümtsüba, tenipong tabelen mahra tajichilena dendaktsüba, kati ka nem tai tatok agutsütsüba, aser talisa 'Kodak Senso' akümtsüba indang sayur. Ajisuaka, kodak senso akümtsü sayur kin-to tanübo, alima senso nung, kin-kidong otsü nung tambu/tamabur raktepa ken o ashishitepba ya anentsüla. Aji oda, asenoki alima kintem dang Yisu osangtajung sayutsüngir, saka asen atepzüng nungpo asen o asen na tsüngda kati ka nem tatok magutsütepba aser meputepba otsü/osangtem angashidang, tangar kintem kanga aoksar aser sungmanger...!!! Asen Aotsür Aor Tsüngrem tenzükertem, laishirtem aser loktiliba ajunga nung lennirtemi anir, nutsüng nubur ajunga, tangar dang numamedangtetsüsa akümtsüba mapang ka arudagi. Aji oda, asen Ao kin küküa lumia temenen bushia Tsüngrem dang tatok menangzükra, Israel kin ama Tsüngremi sendokba kin ka akümtsü.

Anungji arung...Ao kinji shisatsü tesadem, mangdang tulu akaba aser taremsü aliba kin ka ta alima nubur dang sayudi. Asen Aor dak aketba tashimait kaji, tangar kin nembo melamela tatok agutsür, saka pei kin nembo takok magutsüteter. Asenok kidong o kidong aser arogopur tsüngdang nung tambu/tuluba/tamabur/mezüngbur...ta obang-mapuba ya jokorla anenadokdi. Asenok temenen lima nung alir asüning, temenen tatidang mekokteti, asenok tsüngda nung obang-mapuba kar lira, tangar okadak sabang nung masü, asen sasep nung, nungko mebenteti angatetteptsüla. Aji oda, asen o asen na tsüngda tai temeden bushitepra, karbo aitsü aser kar medentsü. Surabang, tair-ji koba jenjang ka nung atemtsü (?)...ta asenok ajaki khen arokaroka shisadangdi. Anungji Aotsür Aor tamanger tajungtem, asen o asen na tsüngda nung tai temeden mebushitepi aremszüktepa aser lenji arutepa, asen sasep nung telemtetba tajung agitsü lenmang bushitsüla. Aor lennirtem... "Ao kin ya ochi nung nokdakba aser ochi telemtetba agutsür kin ka sudi". Ao kinji Naga nung ajunga nukrangdong lir. Küm-150 sua amangertem...Naga nung rongnung mezüng tamang yimsu agizüker kin, kati ka den meputepi litepra, tangar menudong kin ka akümtsü. Asen o asen na kenbang-obang mapuba ya ngur...Oboula Dr. Clerk o Rev. Kijung nungeri kodak nungi temulong shiranga, nuktsü yima repranga alitsü sudi...ta nuklai arur. Anungji asen o asen na tsüngda nung tai temeden mebushitepi, kati ka nem tatok agutsüdi...ta Aotsür Aor ajak dang ayongzüker.

- Yimozülur dangi-

15th NAP (IR) Mahila Band nem tetushi agütsütsüla

"India's Got Talent" (IGT) ya India nung "Reality Show" tulutiba rongnung ka ta züngshir. IGT ama sentong tulu ka nung taküm Nagaland nungi 15th NAP (IR) Mahila Band-i shilem agitsü maangka nguteta parnoki tedendangertem mulung chidakja "Golden Buzzer" aseben tashi ngua India lima rangben anokshidaktsüogo. Par band ajanga nema tangtetsüsa tenüng tajung bener arutsüba den Nagaland state kanga wangshidaktsüogo, anungji, iba asoshi parnok nem tenüngsang tetushi aser aküm agütsür. Ya atamata ka dangbo masü ta bilemer. Iba jenjang tongtetba ya Nagaland asoshi otsü tasen ka yanglur asütsü. Mahila Band züngsem shirnokisa shilem agidar, parnok nem yabo tepela tamaittsü sayua shilem agir ajak nem Government of Nagaland/Police Department-i promotion agütsütsüla ta shidanger. Tang ya asenoki moa Nagaland DGP, Rupin Sharma IPS ya "nüburttem DGP" lir, anungji, pai Mahila Band züngsemtem atema ya langka tajung kabo inyaktsüdi süng ta teimla tulu akar. Jenjang tuluba ajangzükettsü asoshi 15 IR Mahila Band Tsüngremi maneni maojangma.

- WATILEMBA
Former SSO (SSP)
HG CD & SDRF
Nagaland: Kohima

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

CCCRC Golden Jubilee tembangogo; bangzüng asem renem



Chetheba (Phek), September 11 (TYO): Anogo asemnü tashi Chetheba, Phek nung Council of Chekhesang Christian Revival Churches (CCCRC) Golden Jubilee "Great is Thy faithfulness" omen nung amongba sülen Amongnü tembangogo.

Iba Jubilee nung bangzüng asem renem aser Manipur nung yimjung atema sarasademja liasü.

Amongnü CCCRC Executive Secretary, Rev. Rathvü Thuvury-i bangzüngtem zünga metetdaksüba sülen loktii bangzüng asemprong agizüka ayu.

Jubilee mong nüngtem nung CCCRC-i "Mapang ajak nung Tebu, Techir aser Tanela Temeshi dak amangtsü aser Tenla Temeshi nem anidaksütsü," bangzüng renem.

CCCRC-i maneni mission mapa inyaksü aser Khrista o s a n g t a j u n g mangashibapurtem den osangtajung lemsateptsü bangzünga ayu.

CCCRC-isa Arogo ajak

dang Arogo shia nungi missionary kabosa yoktsü mesüra missionary kabosa sponsor asütsü atema ajungshitsü renem.

Iba Jubilee mong nung tongti o jembir, Nagaland Christian Revival Churches Mission Secretary, Rev. Dr. I m c h a y a n g e r - i amangbapurtem dang tatem maka taküm alanzüktsü atema Tanela Temeshi agizüktsü ajungshia liasü.

Tanela Temeshi agizüktsüji kanga tongtibang aser Tsüngrem den jajatsü atema ibaji nüngdaker, ta pai ayongzüük.

Paisa CCCRC Arogotem dang bangzüng renemba ama inyaksü aser taküm lenla ajak nung Kibubai sayuba ama alitsü ayongzüük.

"Jubilee ya südoksünemba mesüra asadangba mapang ka masü saka Yisu Khrista nem bendanga agütsüshiba aser Khrista osangtajung prokba aser missionary mapa inyakba ajanga süngjang tangtsütsü atema atemzükba mapang lir," ta pai ashi.

Nagaland Christian Revival Churches tenüng nung salem osang lemsatepdang Tir, Rev. D Wangpong Phom-i tanelai memelungba mapatem indang rajemdaksütsü nüngdak; ibaji ajanga dang amangbapurtem tanela nung asentenshitsü, ta ashi.

Kasa sentong nung Manipur state nung yimjung alitsü atema temeja sarasadem ka agia liasü.

Amongnü sentong nung mendenbubaji CCCRC Chairman, Rev. Zaseyi Veswüh liasü aser Associate Pastor, Rev. Vekhoü Dawhuo-i sarasadema sentong tenzüük.

Pastor Solhou Sono-i tenla meshiteta sarasadem, Zenith Band aser Jubilee Choir nati ken aten aser Pastor Rev. Dr Khape-i Lai zünga liasü.

Nikongdang sentong nung o jembirji Nigeria nung aliba Christ Embassy Church nung pastor, Victor Ogbe liasü aser sentong tembanga linük tesem balalai yoka aliba CRC missionary tem atema sarasademja liasü.

ANOGO ABEN TSÜNGREM DEN

Timtem tashi

T. Ken 129:1-8

Tekong 3 nung kija timatempa indang ashiba angur. "Alu alirtemi kü rungdong manung alu ala; parnoki meritsüng talang yanglu". Kija taküm kangshiba noksa aika Laishiba nung angur: Tzüyim yipru ajangba mi tesashi ajangba, tongpang rara ajangba aser khuret abenba. Kechiba ken züluri alu alabaji kija timatempa noksa ama amshi?

Mapa kaji, nüburtemi paji jana amshir ta ken züluri bilem. Parnoki ashi, "Na alu nung jana ama lir, aser onoki iba alu onsatsü, aser nai kechi bilemer onoki au ta mali". Asenoki Yisu asoshi lira, nüburi Pa amshiba ama asenoka amshitsü ta bilemang. Parnoki Pa jana-rüja ama amshi.

Iba noksa ochiba teyongtsüji alu alibaji alu rutsü asoshi lir. Kodang nüburi na jana ama amshidir, tai bushiba ne rungdong nung alenlokdir aser taitüsüba agi ne rungdong tusadir, ya bilemtetang; alu rutsü asoshi Tsüngremi na renemtsüdagi. Kechi koma aluruba? Ibaji nai aremba metsü dak aket. Nai mang ayangba, tesempatep, tenük merem, mokok aji metsü remra alu rubaji taku asütsü. Saka nai Tsüngrem o metsü remra, temeim aser yimjung aser taremsük agi ne mulungjang nung yimsü südaksüra, na ken zülur den Kibubaji Temeshi lir ta shitettsü- Pai iba tebilemetsü bentettsü. Idangji tekong 8 nung ashiba ama, alurubaji temoatsü ka alitsü: "Kibuba temoatsü nenok madak liang; Kibuba tenüng nung onoki nenok moatsür".

Ne taküm nung nai alu ruba ka kanera nai ali tusatsüla, atemtsüla aser tzü aintsüla. Koang nüburi na jana ama amshidir, kodang alu alaba ama ne taküm tetendangbaji alu alaba ama ne taküm ajanga odir, alu rutsü asoshi renemang. Tanü Tsüngremi na asoshi temoatsü alu ruba ka yutsür, anungji metsü shidak yoktsü bilemtetang.

CEF-i küm shia tanur million 100 den Khrista indang lemsateptsü: Moises Esteves



Moises Esteves

September 11, 2023: Child Evangelism Fellowship (CEF)-i Khrista osangtajung agi akokba tashi tanur aika ayimjemtsü nükjidong yur inyaker.

Osangbener den jembidang CEF Executive Vice President, Moises Esteves-i, "Laishiba nung kanga tepor ajangba Lai tekongtemji Tsüngremi tanurtem atema bilemetsüba lir," ta ashi.

"Tenüngsang Ken tapu 78

ajanga asenoki tarutsü putu dang Kibubai tajung inyakba atema tenüngsang agütsütsü aser Pa tashi ajanga tesüngmangtsü mapa inyakbatem indang ashitsü shia lir. Ibaji sorkari meinyaksü. Tsüngremi amangbapurtem nem tanurtem aser tarutsü lanurtem dak rangloker Tsüngrem shisatsü indang lemsatepdaksüner. Ibaji asenok teinyaksü mapa lir. Künü anogo kari onok dang, tarutsü lanu putu

den jembitsüji asenok teinyak mapa lir ta ashi," ta paisa metetdaksü.

CEF ya International ministry ka lir aser 1937 küm nungi tenzüka parnoki mission mapa inyaka tanur ajak den Khrista osangtajung lemsateptsü aser tanela nung anitettsü rangloker inyaker.

US kübok state 50 nung CEF lir aser linük teimbaka nung CEF lir.

CEF indang alizüng tasebaji küm shia tanur million 100 den Khrista osangtajung lemsateptsü atemzükba lir.

Iba alizüng atongtsü atema CEF-i Good News Club densema ministry aika tenzüko.

"Mekümzükbapur tanurtemi Khristaji pei taküm nung Kibur aser Kümtetdakba ta agizüktsü atema tanurtem nem maongka agütsütsü atema onoki osangtajung lemsateper," ta pai ashi.

2022 küm kija nung CEF-i alima tesem balala nung tesayur million tesadang nem training agütsüo, ta Esteves-isa

metetdaksü.

"Tanur kati Khrista agizüktsü jangrara nai kechi inyaksü? Tanur ka tekümtet angutsü atema tesayurtem nem training agütsütsü nüngdak, iba sülen skills training agütsütsüla," ta pai ashi.

"Onoki asalentong renema lir, iba nungji tanurtemi tanurtem den osangtajung lemsatepba densema lir. Tanur rongnunga tantsü-tambutemi kasa pur tanurtem den osangtajung lemsateptsü akok," ta paisa metetdaksü.

Esteves ya tebu ka aser semchir ana lir, anungji pai tanurtem den osangtajung lemsateptsü atema jungjunga meteta lir.

Pa Portugal nung asoba sülen pa arrshi küm 9 dang asüadang Khristan camp ka nung pai mezüng Khrista osangtajung angashia liasü.

Pa kibong akümba sülen US-i ao aser 1993 küm pa kinüngtsü tenati Vermont nung CEF tenzüksü tajaba angateta liasü. Tatemsa pa Missouri nung aliba headquarters-i ao.

"Ni ozü tanurtem den Khrista osangtajung lemsatep, iba sülen semchir ana den lemsatep. Tanep ni parnok tekümtet atema sarasademsü. Semchir katibo tang tashi o mejembir, anungji osangtajung angatettsü atema ano mapang agitsüa akok. Tanurtem den osangtajung lemsateptsüji kanga tongtibang. Tanurtem melungjangji kanga teladak, anungji asenoki iba nungjagi maongka agitsüla," ta pai ashi.

Khrista osangtajung agizükttetsü atema mapang tajungtibaji arrshi küm 5 nungi 12 tsüngda tanurtem lir, ta Esteves-i metetdaksü.

"Tanurtemi osangtajung nüngdaker, parnoki Tsüngremi taküm nung agütsütsü aliba teimla nüngdaker. Tanur asüadang asenoki Khrista indang lemsateptsüla. Parnok temelungang teladak asüba mapang parnok den Khrista indang lemsateptsüla, kechiyong parnok tain kümerbo temenen khuji kanga taret asütsü aser temelungjang temerangba akümtsü," ta paisa shisem.

AO OSHI ANGAZÜKDAK:
TANÜ ANGAZÜKTSÜBA OJANG



Saksak

(adj) tebang teruru, talila chia jemnüba (hankering for food)

* Tanur asüdangbo nisung ajak tebang tesaksak asür.

Saksaka

(adv) kanga kangshia, mokoksümonga (with difficulty)

* Arem nungi süngkong kanga saksaka atsür adok.

OLONG PAITEP # 6633

15x15 crossword grid with numbers 1-15 indicating starting positions for words.

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenür'er jabaso - (4)
- 10. Sen latetsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6633 TELANGZÜBA

TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan,
- 13. Tinu.

NAI-A YA METETTER MA
KÜM KA NUNG FILM 777 REPRANG



The man would watch up to three films on weekdays. On weekends, he watched even more films, and on average, his goal was to watch about 16-17 films a week.

United States nung nisung kati küm ka film teimtiba reprangba otsü tasen ka yanglutetogo. Zach Swope-i July 2022 nungi July 2023 tashi film 777 repranga liasü. Tesüiba nung France nunger Vincent Krohn-i 2018 küm film 715 repranga otsü yanglua liasü saka tang Zach Swope-i iba otsü ajatetogo.

Arishi küm 32 tain Swope-i "Minions: Rise of Gru" film repranga tenzük aser "Indiana Jones and the Dial of Destiny" film repranga tembang.

"Iba record atema Swope-i film ajak tetenzük nungi tatem tashi reprang" ta Guinness World Records ajanga metetdaksü.

Assam nung Rs 25 crore alang heroin apu

Guwahati, September 11, 2023 (Agencies): Assam police-i tesüiba ghonda 24 tsüingda Kamrup Metropolitan district kübok tesem asem nung Rs 25 crore alang heroin puogo aser iba dak sendakba nung nisung 8 pua lir.

Deobar aonung Central Guwahati Police District (CGPD) aser East Guwahati Police District (EGPD) külem telok kati Jorabat area nung mita aodang heroin seret 2.527 apu. Iba indang jenjang ya international market nung Rs 21 crore shi asütsü.

Heroin ji sapon pongdang 198 nung enoka liasü aser gari ka nung miima bena aliba angu. Iba dak sendakba nung Md

Amir Khan (31), Md Yakup (29) aser Md Jamir (34) nunger apu aser parnok ajak ya Manipur kübok the Sangaiyumpham Mairenkun Mayai Lekai, Thoubal district nungi lir.

Assam police-isa Deobar aonung Gorchuk tesem nung mita aodang mozü shibelener ka apu. Iba nisung ya Dwipen Daimary ta jangjaogo.

Daimary ya Udalguri district nungi lir aser pa ket nung sapon pongdang 16 nung heroin gram 203 bena aliba nguogo.

Daimary ket nung apuba heroin indang jenjangji international market nung Rs 1.8 crore shi asütsü.

Gorchuk police-isa pa ket nungi motorcycle (AS01-DR-

7896) ka aser mobile phone ka puogo.

Honibar aonung tesü Jorabat police outpost nunga gari ka sota reprangdang nisung pezü apu aser parnok ket nungi heroin gram 251.2 bena aliba angu.

Gari (AS01-FK-1067) ka nung sapon pongdang 21 nung heroin bena liasü. Iba indang jenjangji Rs 2 crore tema asütsü.

Jorabat police-isa mobile phones 6 aser Rs 1.16 lakh bena aliba apu.

Jorabat police-i apurtemji Prem Gogoi (32), Bhaskar Jyoti Bori (30), Majun Umbang (30) aser Jhon Patir (23) nunger ta jangjaogo.

Tipraland State Party-i Tipra Motha nungi pilar

Agratala, September 11, 2023 (Agencies): Tripura nung regional political party tongtipang ka- Tipraland State Party (TSP)-i Tipra Motha den tesentaktep pilatsü lemtetogo.

Tipra Motha indang tarutsü kechi ajurutsüar meshitet anungji Tipraland State Party (TSP)-i parnok den tesentaktep pilar ta metetdaksü.

TSP ya 2015 küm tentet aser parnoki 'Tipraha State' takhangba agütsü. 2021 küm parnoki Tipra Motha den loktepa liasü.

"TSP-i 2021 küm Tipra Motha den loktep aser iba ya MoU ka nung ajemdaker

inyak. Tripura Tribal Areas Autonomous District Council (TTAADC) election nung toktepdang onoki takok angu" ta Convener Sridam Debbarma-i ashi.

"Tipra Motha party nung executive committee mali. Parnok tangatetba aser inyakyim lateta mali. Party ka yamai dangbo moutettsü. Telok ka tentetra executive body ka alitsüla saka Tipra Motha nung mali" ta pai ashi.

Tipra Motha nung denaka TSP lennirtem den osang kecha melemsatep ta paisa ashi.

"Pradyot Kishore Manikyaa Debbarma-i Chairman menden nungi anen aser

tebang agi TIPRA Motha president inyaksü atema Bijoy Kumar Hrangkhawl shim saka pa dak tashi mali. Iba jagi onoki Tipra Motha den tesentaktep pilatsü lemtet" ta Sridam-isa metetdaksü.

TSP züngsem kati Member of the District Council election nung toktep aser iba sülen ang Tipra Motha agizük ta TSP lennir Dinesh Debbarma-ia ashi.

"Parnoki tang kechi inyaksü? Parnoki mapa toktsütsü asü? Yamaji mesüra parnoki TSP inyakyim sülen anidaksüla. Onoki iba osang Governor dang ashitsü" ta paisa ashi.

Assam assembly complex nung Mahatma Gandhi kürakyanglu saya

Guwahati, September 11, 2023 (Agencies): Assam Chief Minister Himanta Biswa Sarma-i Hombarnü assembly complex nung Mahatma Gandhi indang kürakyanglu ka sayatsüogo.

Assam legislative assembly autumn session tenzüka anogo nung pai iba kürakyanglu sayatsü.

"Assam Legislative Assembly complex tasenba nung mezüngbuba session jakdang Mahatma Gandhi indang kürakyanglu sayatsüba atema kanga pelar. Mahatma Gandhi-i yimjung, ozüng alema meinyaksü aser putepa alitsü tesayuba ajanga asenok maneni len anir. Babuji ya asen linük atema tesangwa leniba lir" ta



Chief Minister Himanta Biswa Sarma-i ashi.

Assam Legislative Assembly indang complex tasenba ya Parliament Speaker Om Birla-i June 30 nü lapokja liasü.

Iba complex tasenba ya ali

acre 10 nung yanglua lir aser iba kimong nungsa annex buildings yanglutsü ta ketdangsürtemi ashi.

Assembly ki tasenba nung nisung 180 amentsü akok. Tang Assam Assembly nung MLA 126 lir.

GOVERNMENT OF NAGALAND
DIRECTORATE OF SOCIAL WELFARE
NAGALAND :: KOHIMA.

NO.SW/PwD/DBT-2022/

Dated Kohima, the 11th September 2023.

NOTIFICATION

This is for information that online application of Scholarship for Persons with Disabilities (State Scheme) from Class I to Class VIII for the academic session 2023 will be open from 15th September 2023 for fresh applicants and renewal in the Common Scholarship Portal of Nagaland. Eligibility Criteria and guidelines of the Scheme are available in the website <https://scholarship.nagaland.gov.in>

Last date for submission of application will be 30th November 2023.

Sd/-
TOSHELI ZHIMOMI
Director.

AXIS BANK **AXIS Bank Ltd** **Public Notice for – E-Auction of pledged assets being Gold**
 A.C. Market, 4th Floor, 1, Shakespeare Sarani, Kolkata- 700071

The Borrowers, in specific and the public in general are hereby notified that public auction of the gold ornaments pledge in the below accounts is proposed to be conducted by the Axis Bank at the below mentioned Branch. The below mentioned Borrowers has availed the credit facility from the Axis Bank Limited against the pledge of gold ornaments ("Gold Loan Facility") in favour of the Bank towards the security. The Demand notices were issued to the Borrowers/Guarantors calling up the Borrowers/Guarantors to pay their outstanding amount towards the Gold loan facility availed. As the Borrowers/Guarantors have failed to repay the outstanding loan amount, the bank is constrained to invoke the pledge and proposed to conduct an e-auction sale of pledged gold ornaments more particularly described in schedule of property hereunder on 22-09-2023 (dated) at 12.30 PM-3.30PM (time of e-auction) on "As Is Where Is", "As Is What Is", "Whatever There Is" and "No Recourse Basis". Details of Borrowers and outstanding amount.

Branch Name	Customer Name	Loan A/c No.	Amount Outstanding	Date of Demand Notice	Gross Weight Grams	Net weight grams
DIMAPUR [NL]	ALOK KARMAKAR	XXXXXXXXXX2341	108332	30-May-23	30.000	31.300
LHOMITHI BAZAR [NL]	RAJ DEB	XXXXXXXXXX9179	43647	30-May-23	11.500	14.210
DIMAPUR [NL]	NAROLA LONGKUMER	XXXXXXXXXX1472	222951	27-Jun-23	60.000	60.700
PURANA BAZAR, DIMAPUR [NL]	DHARMENDAR PRASAD	XXXXXXXXXX1946	124358	15-Jun-23	32.000	34.200

Axis Bank Ltd. has the authority to remove account/change the auction date without any prior notice. Auction will be held online <https://gold.samil.in> (website of online vendor) between 12.30 pm-3.30pm (time). For detailed Terms and conditions, please log into given website <https://gold.samil.in> (website of online vendor)

Date: 12.09.2023 Authorized Officer
 Place: Kolkata Axis Bank LTD

Office of the
Longmisa Senso Mungdang
 P.O.Mokokchung-798601. B.P.O. Longmisa
 Mokokchung : Nagaland.
TENÜNGSANG AGÜTSÜR

Mr. Alisenzung Jamir aser Mrs.Katemnungla Pongen na jala Miss.Samasongla Jamir NPSC tatidang nung Junior Divisional Accountant under Treasuries and Accounts Department, nung ajangzüktetba asoshi LSM ajanga pelaba konang nungasang aser tetushi agütsür.

Tarutsü anogotem nunga maneni Tsüngremi takok moajang ta LSM-i sarasadema atar.

Sd/-
Yashiramok Ao
President, LSM



Sd/-
Watitoshi
G. Secretary, LSM

Office of the
CHUBAYIMKÜM STUDENTS' UNION
 P.O. MOKOKCHUNG
TENÜNGSANG AGÜTSÜR

Kr. Aosangla Pongen, Wb. Imnalepzung aser Wt.Ngangshipokla tena jalai 2023 kum NPSC tatidang nung Information Assistant under Information and Public Relations Department nung takok jenjang tulu ngutetba atema Chubayimkü Students' Union ajanga khonang tetushi tenungasang tulu agütsür.

Tarutsü nung ne sempet tajung ajanga asen lokti tejaklani anitsü asoshi Tsüngremi maneni ne takum aser wadang moajangma.

Sd/-
Takonungasang
President, C.Y.M

Sd/-
Imnasangla
Gen. Secy., C.Y.M

Putin ajurutsü North Korea lenir Kim Jong Un ayamesogo

Seoul, Rongjui/Sept. 11 (Agencies): Russia Tir Vladimir Putin ajurua senden amentsü asoshi North Korea lenir Kim Jong Un Vladivostok leni ayamesogo ta osang ajanga ashir.

Kim bendang limai aodang amshiba armoured train ya Pyongyang nungi ayamesor mesük, ta South Korean sorkar ketdangsür kati ashi.

Lenir ana tsüngta senden ya Mongulbarnep amentsü imlar.

Taoba mapang Russian news agency Interfax-ia anogo ishika tsüngta Kim arutsü imlar, ta shia liasü.

Putin den senden ya menra, North Korea lenir asoshi kum pezü dak tema lir aser pandemic sülen tang mezüngbuba bendang limai aor alitsü.

Tena senden amenba mapang Ukraine nung raraba nung yaritsü asoshi North Korea-i Moscow nem nok-nü agütsütsü akok, ta US ketdangsür kati shia lir.

Kim tesüsa linük yutsür aoba

ya 2019 kum Vladivostok-isa Putin den mezüngbuba ajuruteptsü ao, aser iba mapang North Korea indang nuclear disarmament ken o US tir Donald Trump den jembishinüba terenlok mali anenadoker liasü.

Kim ya 2019 kuma Vladivostok yagi train nungsa ao.

Iba train nungya bulletproof gari 20 shi lir ta angazüker, anungji danga train dang taretba akumer aser ghonda ka nung kilometre 59 dang tekeraba mejajateter. Pa Vladivostok-i aoba ya anogo tepiyong agitsü imlar.

Linük ana tsüngta nok-nü asoshi jembishinüba nung terenlok aliba osang tasen lir, ta White House-i shir sülen iba senden amentsü osang ya arur.

Russia Defence Minister Sergei Shoigu-i tawa North Korea semdangba mapang Russia dang artillery ammunition ayoktsü asoshi Pyongyang mesüzüktsü merang, ta US National

Security Council odongtar John Kirby-i shia liasü.

Russia-i North Korea dang artillery shells aser rocket artillery munitions densema conventional arms meshitsü akok aser iba melen North Korea-i chiyongtsü aser 'raw materials' tem meshitsü aser United Nations ama international forums nung maneni Pyongyang bhukumtsü.

Russia-i 122mm aser 152mm injang nungdaka alitsü südi ta bilemer, kechiaser par ket nung aliba tagimar, saka North Korea nung artillery oset kechisa aliar mejangja.

July ita Kim aser Shoigu tsüngta senden amendang Hwasong intercontinental ballistic missile densema nok-nü balala sayua liasü. Iba ICBM ya North Korea nung solid propellants amshiba missile mezüngbuba asütsü südi ta ashir.

COVID pandemic sülen Kim-i bendanger asoshi par linük kishi lapokba mezüngbuba liasü.

Pakistan nung security force ka pokset



Peshwar, Pakistan nung lenmang tezülen bomb ka apokdang gari ka raksar aliba Palistani security officers temi repringba noksa nung angur. Hombarnü Peshawar yimti nung Pakistan security forces dak tenük yoker lenmang tezülen bomb ka pokdaktsüba nung security force ka asü aser civilian kar densema yiru.

Islamabad, Rongjui/September 11 (Agencies): Pakistan kübok Peshawar anasa bomb ka apokba sülen paramilitary personnel ka asü aser civilian ana densema nisung ti tashi yirua liasü.

Police ketdangsürtemi ashiba agi, Khyber Pakhtunkhwa division indang paramilitary ketdangsürtem mena aliba gari ka Peshawar leni oya aliba mapang maka liasü.

Ketdangsürtemi ashiba agi, improvised explosive device (IED) ka amshia iba gari pokdakja liasü.

Bomb apokba tesem nung tangokba video ka ajanga sepaitem mena aliba gari kanga mejungi raksar aliba sayuogo, iba den Security force aser nüburtem iba tesem nung adenshir aliba nguogo.

Khyber Pakhtunkhwa province nung pei temang nung bomb alenoker

pokdaktsürtemi security personnel teku tepsetba den nisung 17 yirutsüba sülen anogo ishika lir tang iba lendong ya atalokogo.

Maneni kasa province nungsa Khar tesem nung July 30 nü lendong tulu ka ataloka liasü. Pei temang nung bomb alenoker pokdaktsür kati political party senden ka nung bomb ka pokdaktsüba sülen nisung 54 pokset aser ano nisung 100 yiruja liasü.

Sudan yimtiba nung nisung aika tepset

Khartoum, Rongjui/Sept. 11 (Agencies): Sudan yimtiba, Khartoum kübok kanga mazüngi aliba market ka nung tapoktsü nok-nü agi kongshiba sülen nisung 35 asü, ta medical charity ajanga ashi.

Ibai nisung aika takum samatsütsü merangba mapa lir aser nisung 60 dak tema yiru, ta Médecins Sans Frontières (MSF) ajanga ashi.

Yangji alirtemi ashiba agi, Khartoum south tsütsü Qouro market nung Deobarnü military aircraft kati bomb pokloktsü.

Iba linük nung mitkar telok balala tsüngta April ita nungi rara arur.

Khartoum nung ita trok jungnüa rara arudagi, ta MSF indang emergency co-ordinator Marie Burton-i Deobarnü shia liasü.

"Ajisüaka Deobarnü yimti nung iba lendong atalokba yagi Bashair hospital nung volunteers aser medical personnel tem kanga aoksar lir," ta lai tamalen Twitter ta ajaba X nung ashi.

MSF ajanga ashiba agi, 'explosive weapons' agi iba market nung kongshi aser ano tayimtsü amshia aser injang-bomb tulu amshia amakba manener aser iba yongji nüburtem tim atemba aser takum samaba bilemdangtsü makok.

"Bomb apokba ajanga temang shilem poksatsür aliba takumtem kumzüktsü meranger. Ibai nisung telok tulu samatsütsü merangba lir," ta MSF ajanga ashi.

Khartoum nung aliba Bashair Teaching Hospital nung inyaker MSF nungi Loretta Charles-i ashiba agi, nisung aika tetsüng-tepen rangdoktsüsa lir aser aika tekolak, teko aser tepok nung yirua lir.

Iba lendong nung asür ya nisung 50 jungnüa lir, ta nisung kari ashir.

April ita army chief Gen Abdel Fattah al-Burhan aser paramilitary Rapid Support Forces (RSF) indang commander, Gen Mohamed Hamdan Dagalo tsüngta mangatetep adokba sülen Sudan nung civil war adoka lir.

Nisung million pongu shi pei ki yutsür tesem balala nung jenoka lir aser meyirijang aika takum samaogo. Iba rara agi Khartoum aser anüolen tsütsü Darfur region nung tamajungba kongshia lir.

RSF yagi Khartoum tuluba aser anasa aliba Omdurman aser Bahri amokbanga lir. Aser item yimtitem tanaben agitsü mechi mitkar temi tayimtsü amshia amaker.

Hopta ka tejakdang tayimtsü amshia amakba mapang tanur ana densema nisung 20 tepset, ta activist temi ashir.

Iba rara tatem kati arudaktsütsü mechi US, Saudi Arabia aser danga linük temi tetsüngtai aitsü meranger saka takok mangur.

Nüburtem raraba tesem nungi jena odaktsütsü mechi ceasefire aika sangdong saka itemjia raksaogo.

Novak Djokovic-i US Open kokogo



Rongjui/September 11, 2023 (Agencies): US Open tebur kija asaya final nung Novak Djokovic-i Daniil Medvedev koka Grand Slam 24buba kokogo.

Arishi kum 36 tain Djokovic-i iba asaya 6-3, 7-6 (7/5), 6-3 agi koka liasü. Iba asaya akokba sülen Djokovic ya tebur asayartem rongnungi Grand Slam timtiba akokba asayar kumogo.

"Ni Grand Slam 24 akokba indang jembitsü ta bilema maliasü," ta Djokovic-i asaya akokba sülen ashi.

Serbia nunger asayar ya season ka nung pezüben tashi Grand Slam asem akokba

asayar mezüngbuba kumogo. Pa ATP ranking sayaba mapang number one asayar akümtsü.

Taküm pai Australian aser French Open kokogo, ajisüaka July ita Wimbledon final nung pai Carlos Alcaraz mekoki liasü.

Medvedev-i 2021 kumbo US Open final nung Djokovic straight sets nung koka pa kum ka nung Grand Slam pezüprongla akokba mezüngbuba asayar akümtsü aliba nokdanga liasü.

Asaya nung Djokovic-i kanga junga asaya tenzük aser pai Medvedev indang serve break süa 2-0 agi tejkadang aküm.

Iba sülen game pezübuba nung Medvedev-i mezüngbuba asaya akok saka pai Djokovic menokdangtet aser pa 2-5 agi tesülen liasü. Iba sülen Djokovic-i pa indang serve break mesüdaktsü asaya koka liasü.

Tanabuba set nunga Medvedev-i tera tajungba asayateta mapang ka nungbo pa 5-4 agi tejkadang liasü saka iba sülen Djokovic-i asaya asem atonga koka tanabuba set-a akok.

Tasembuba set nung Djokovic 3-1 agi tejkadang ser tenzük aser Medvedev-i asaya akoktsüsa masayateti Djokovic nem asaya kokdaksü.

Men's Open Volleyball championship Sept 30 nü tenzüksü

Kohima, Rongjui/September 11 (TYO): Hon Jubilee nüngdem nung Runguzumi Youth Association-i ayongzükba Men's Open Volleyball Championship 2023 September 30 nü nungi tenzüka Local Ground Chozuba nung asayatsü.

Asayamung akokba team nem senpet sen 30,000 aser tanabuba jenjang nung tembangba team nem 20,000 agütsütsü. Semifinal nung tamakok anguba team ana nem senpet sen 5000 agütsütsü. Maneni Best setter aser best spiker nem senpet sen 2000 agütsütsü.

Asayamung nung shilem

agitsü atema form, Vethitalu Shop Chozuba Town (Ph. No. 8787818219), Ate Shop Chetheba (Ph.No. 8118949752), M/S L.R Computer Hardware, Phek Town (Ph.No.6009245320), Excel Shop, Main Town Pfutsero, Multiplex Kohima; (Ph.No 7005453009) nung angutsü.

Entry fee sen 200 asütsü aser form benoktsü atema tatembangbuba anogoji September 29 asütsü. Osang tejangjaba agitsü atema item number: +918787530189; 8787800833 nung tongteprateptsü asoshi asayamung ayongertemi metetdaksüogo.

Germany coach Hansi Flick mapa nungi anentsüogo



Rongjui/September 11, 2023 (Agencies): Japan goal 4-1 agi makokba sülen Germany-i Deobarnü tebur football team coach Hansi Flick mapang nungi anentsüogo.

Coach mapa nungi anentsüba sülen taruba kum European Championship ayongzüka asayatsü lia team nung mepetmesü taliba kuma aoer ama reprangteter.

German soccer federation koba dang DFB ta ajar parnoki ashiba agi, taruba asaya atema coach asem rongnung director

Rudi Völler-a ka asütsü. Parnok Mongolbarnü France den Dortmund den friendly ka asayatsü lir.

Germany team-i taoba asaya pongu tashi ka danga mekoki lir aser parnok taoba kum World Cup nunga group stage nung tsüka liasü.

Japan makokba sülen Flick-i, pai maneni coach mapa bener ta shiogo. Deobarnü pa lenisüba nung team fan tem densema training session ka agiba sülen pa mapa nungi anentsüba sangdonga liasü.

Spanish football tir Luis Rubiales-i mapa toktsüogo



Rongjui/September 11, 2023 (Agencies): Spanish football federation tir Luis Rubiales-i Deobarnü pa mapa toktsüogo. Tetsür World Cup nung asayar ka dak tebang mesepba ajanga mepetmesü adokba sülen tang pa mapa nungi anenogo.

Suspend sütsür aliba tir yagi pa mapa nungi anenba shiti interim tir nem agütsü, ta pai shiti ka ajanga metetdaksüba den pai mapa toktsütsü atema telemtetba agiba indang television interview ka nung rasa ashi.

"Ni mapa toktsütsü kechiyong ni kü mapa maneni inyaka motettsü," ta Rubiales-i television show "Piers Morgan Uncensored" nung ashi.

August 20 nü Sydney nung Spain tetsür team-i World Cup

akokba sülen medal agütsüba mapang midfielder Jenni Hermoso dak tebang mesepba sülen lenla balala nungi Rubiales aija liasü.

Pai pa mapa toktsütsü memulungba sülen FIFA-i pa anogo 90 atema suspend sütsü aser kasa mapang nung Spanish public prosecutor temi taoba hopta sexual assault aser coercion dak sendakba nung pa anema ken o ka benokogo.

Arishi kum 33 tain Hermoso-ia Mongolbarnü National Court nung tashishiba ka agütsüogo aser la dak mebeshitsü yimya beshiba atema Rubiales aitsüogo.

Rubiales-i Deobarnü aonung shiti ka ajanga, pai European football governing body UEFA indang tatong tir mapa dena toktsüba sangdongogo.

Rubiales, shibai Hermoso dak tangatetep nung tebang mesep ta shia arudar, pai ashiba agi, pa anema nokdakba ajanga Spain nung football asaya meyrutsüner.

Rubiales-isa, pai mapa toktsüba ajanga 2030 men's World Cup atema bid asüba nung Spain densema aliba nung tetsükdaktsü kecha matokdaksütsü.

Iba tatalokba sülen Rubiales-i pa inyakyim pusema jembiba sülen tetsür asayar 80 dak temai longkak aita liasü.

RFEF (Spanish football federation) lenirtem memelenshi tashi asaya nung shilem magitsü ta asayartemi shia liasü. Kasa mapang nung tetsür team coach coach Jorge Vilda-a Mongolbarnü mapa nungi anentsüogo.

Pakistan nung telungpurtemi football asayar 6 pur ao

Rongjui/September 11, 2023 (Agencies): Hopta tatemi telungpurtemi lanur football asaya trok pur aoba sülen Security forces temi Hombarñü parnok bushidar, ta minister kati ashi.

Arishi kum 17 nungi 20 tsüngda alir local football asayartem ya Honibarnü Balochistan province nung Dera Bugti district kübok Sui jila nung asayamung ka nung shilem agitsü atema oya aliba mapang pur ao.

Interior Minister Sarfraz Bugti-i Deobarnü aonung menor ashiba agi, "parnok pur aoba tesem temeket ajak sabanga yuogo aser pur aoertem meyipa anir arutsü atema takokba tashi

jenjang tapet agidar." Paisa, football asayartem pur aoertem ya Baloch Republican Army nungi lir. "Iba ya süoki ia agitsüba ken o ka lir, kechiyong tanurtem kiralongrartem ket nung lir," ta pai ashi.

Tenük kuli agütsür aser kinungertemi ashiba agi, lanurtem ya züngsem 16 agi kumtetba team ka nung densema liasü, shirnok prangbong agi teneter anendaksü aser iba sülen asayar kar pur ao.

Security ketdangsür kati ashiba agi, asayartem ya separatists tem den sendaktepa liasü shirnok tawa security forces matsüngdang bendanga agütsüogo.

BILEMDANGANG

"Mapa tulu tila mesükshi ajak meranga inyangang."